

## **HNA THA HA MANENÂ HOFUC A KHACA**

**HOBİKÂU HNA THA HULIWAN HNA TREN MÖTR EÛ HNYI KÖIÖ JE SO ÛNYI ADREM, HOBËTR KÖIÖ, JE HME, IWAI HELÂE IWAJI HNYI IAAI KE NE OBUT HEO. JE HNA TREN MÖTR EÛ HNYI KÖIÖ AME KÂLÂ JE HNA IP ME HNA MELÖ HNYI HWEN.**

### **IAAI NAIN SEPTEMBER HUNA TRU THAUSAN ME SIK**

## **HNA HA A BÂN HNÂN OMELAMÂ**

Haba hna ham but musiiny me metâiny hobêtr köiö me eû hnyi köiö hnen Etat Français ka je kekeihen hnyei (Province) a deny hnanyibu 46 alinea 2 eû hnyi loi organique n° 99 – 209 hnyi tehi mac 1999 me hnyi hnanyibu 3 eû hnyi loi du Pays n° 2001 – 017 hnyi 11 jenuare 2002. Ke haba province des Iles me e ûcû but kâu walang ang he ka hom ke je hna ip hobikâu hobêtr köiö me eû hnyi köiö he ka oûnyihnatho hnyi hwen hnyei.

Eling hna ha manenâ hofuc a haca, me haba öhmun je homakan Province des Iles, je than totr, je than ae ûhnyikong me je tuhan je lap öhmune tha hnyimêk hnyi hnyin iwahmêkhmetu öhmun kôu hnyin tha huliwa he ka tha tuö me söng ûbekhötiny hobêtr köiö, je hme, iwai helâe je iwaji hnyi IAAI (UVEA) ke ne o but Heo. Hnân he ka kâtr hmâ soiny me hmanenanginy hobikâu je de ö at a biliny.

## **JE TABEN AE GAN**

Hna ûnykûme eang ame kunöhmun ka tha huliwa totr hnyi je taben a faip öhmune tha ip.

### **TABEN ABÂN : HNA HAIHNATHOÂ SOINY ME HMANENANGINY**

Öhmune haihnathoâ soiny me hmanenanginy ae ke man hnyi köiö, je hme, je bomene, ta je ûnyi ae mötr eû hnyi hnyin (truba, papanu, ajilat.... ), eang IAAI ke ne o but Heo.

### **TABEN A LOINY : HNA HAIHNATHOÂ JE HNA TREN TANG OMJEÛ HNYI HNA IP K'ÖTIN ELING HNYI HWEN**

Öhmune haihnathoâ me haba köiö, je hme, je bomene, me ta je ûnyi ame mötr eû hnyi hnyin (truba, papanu ajilat....) eang IAAI ke ne o but Heo me waleling ke hwajekhôu hnyi hwen. Haba hwajekhôu eling me taben iwmiiny aten hnyei me imötr kôu hnyi je lap ke e ame obekhötâ kânâ kânân je than.

## **TABEN A KUNINY : HABA THA TUÖ ME WALE HNA THA HULIWAN.**

Öhmune hnöhmun ka tha khaca ka tha anyâ huliwa hnyi hnathu me tha pucoâ he ka kâtr hmâ ûbekhötiny hwajekhoû hnyi köiö helâe hminya hna melö gatin hnyi hwen ötin. Hnyi hna ha eling öhmune hai hnathoâ musi anyin Province des Iles me hwan je than : je than totr, je than ae ûhnyikong, je tuhan je lap he ka tha tuö köiö me je hme..... Hnyi musi me hnyi ien aten hneyi IAAI.

## **TABEN A WËKINY : HNA TUÖ ADRE OKÂU HELÂ ME HNA WEITRÂ SOINY**

Öhmune ûnykûme me haba hna he ka tuö köiö me ama hu hna weitrâ soiny eû hnyin je huliwa anyin at me hwegien köiö he ka kâtr soiny ta je ûnyi hia thithö ae mötr eû hnyi hnyin.

Haba hna he ka tuö me ham viiny hna tren hnyi köiö me ama mokutr hnyi ke hna ip ae tetr hmâ balua. Wale ame he at ka hmëkâ hnyin je huliwa ame anyâ, ame tha he me je hna melö ae ûcû hnyi hwen.

## **TABEN A FAIPINY : HNA HE KA HAM KA JE DE Ö AT A BILINY.**

Öhmune haca he ka ip ke je hna melö ae ûcû ame kunöhmun ka gejon hna he ka kâtr soiny hwajekhoû hnyi köiö hobikâu je de ö at a biliny.

## **JE HNA HE KA OHE Â**

## **TABEN A SIKINY : KE GETHENINY**

Öhmune wâ ûnykûme tha huliwan hna tren eû hnyi köiö me je hme helâ man ke getheniny ae tetr hmâ balua eû hnyin ûlingötin köu ötin.

## **TABEN A SEVENINY : TULUTINY THA HULIWA**

Öhmune khaca he ka tha op tulutiny tha huliwan hwajekhoû hnyi köiö me je hme..... Öhmune he ka elâm eme he aten hneyi IAAI he ka hom eme anyin « Tulutiny tha huliwa ».

## **TABEN A EITRINY : HNA IP AME TABENE HNYI HNA TUÖ SOÂ.**

Öhmune ha hwegiâ getheniny « tulutiny tha huliwa » eme hnân taben hna he ka tuö soâ. Hnyi hna ha eling me öhmune he ka hmëkâ hnathuiny me haihnathoâ tavët adre wiödra he ka huliwa eû hnyi hnyin. Ke öhmune khaca hminya ka bi denyâ bânâ hnyi ke deny bebwetr anyin je musi hia. Ka hnyi udok ame wetin he ka tha huliwa ka hnyin, hnyi ke dok, hna ometâ me je hna ham hnen tavët metâ me ame he aten hneyi helâe tavët hu hanymen hnyi musi he ka ûca ûnyi ae so hnyi melam.

## **HNA SIHNYIGÖULEN JE ÛEN**

### **TABEN A NAININY : HNA OTILÂ TULUTINY THA HULIWA**

Haba hna otilâ tulutiny tha huliwa eang me hobikâu loli huna (2007-2008)

### **TABEN A TRENINY : HNA BI OUTHUNYINÂ TULUTINY THA HULIWA**

Haba hna bi outhunynâ tulutiny tha huliwa eang me ame he ka hwân e ka um dö kap mouâ musi anyin je wec kekeihen hnyei (Province) me je tuhan hnyi hwen.

### **TABEN A ILEVENINY : JA HNA HA OWISA BÂNÂ**

Hnyi je ûen ae hwetr, ane he ka hu hna okongoâ hwajekhoû hnyi kõiö me je hme.....  
me öhmune he ka totr hwege ka hom logotâ ke je tulut, ke adrema ca thu numen ip obiny  
« Tulutiny tha huliwa »

### **TABEN A TRUOROPINY : HNA WÂ TILÂ GE JE SOINY ME JE OKONGON**

Öhmune he ka hmëkâ me wâ tilâ hnyi huna melen getheniny me hna he ka oheâ eme  
so he ka hom ke hna wâhmëkhmetoâ huliwainy, thibut hnyi je faip huna.